

fice ou bienfait. Il mourut trop tost pour le peuple Romain, & ne fit quasi qu'apparoir au monde : car il ne regna que bien peu avec deux ans, après son pere, estant aagé de 42. ans en tout.

DOMITIANVS.

LE douzieme Cesar, & dernier de ceste planche (seul de tous les autres non trop bien effigié à mon gré) est Domitianus, fils du susdit Vespasianus, & frere de Titus. Mais comme tous les doigts d'une main ne se ressemblent pas, cestuy fut plus mechant que ses pere & frere ne furent bons. Bref, il ne deuoit rien ny à Cesar Caligula, ny à Neron ses predecesseurs, quant à estre vicieux, cruel & mechant. L'impieté sienne ne fut moindre que la cruauté : car il voulut estre adoré & appelé Dieu, tant il fut malheureux. De quoy porte tesmoignage vne sienne medalle de cuiure, ayant au reuers empreint vn temple, à l'entree duquel il se voit tout debout, avec quelques personnes deuant luy qui ont les mains iointes, & sont à genoux. L'une des choses qu'il sceut mieux faire, ce fut de tirer de l'arc : en quoy il estoit si dextre, qu'il faisoit mettre vn ieune enfant assez loin de luy, leuant bien haut l'une des mains, tous les doigts d'icelle entr'ouuerts : & lors tirant plusieurs fleches, les passoit entre ces doigts ouuerts, sans offenser l'enfant aucunement. De ses cruantez ne furent exempts les pauvres Chrestiens : car sous luy fut la seconde memorable persecution de l'Eglise Chrestienne, cōme appert par les histoires Ecclesiastiques. Aussi eut-il son payement de mesme. Les coniuérateurs qui auoyent conspiré sa mort luy donnerent sept coups de dagues, dont il mourut miserablement, mais avec la plus grand'ioye que le peuple Romain receut onques. Vesquit 45. ans, regna 15. ans.

Vous voyez, amis Lecteurs, comme de ces douze premiers Cessars (dont auez les vrais portraits en ceste premiere table) les neuf pour le moins n'ont rien valu, & ont fait tres-miserable fin, & pareille à leur vie, selon les iustes iugemens de Dieu : les vns estans occis par glaiue, & les autres ostez de ce monde par boucons & empoisonnemens.

Exposition de la table marquee A.

AE vous ay desia prié, amis Lecteurs, de ne trouuer mauvais si l'ordre n'a esté gardé, comme ie l'eusse bien desiré, en ces planches ou tables, où vous sont exhibees & monstrees diuerses medalles antiques, Romaines, & entre icelles quelques Grecques : lesquelles on pourroit dire estre inferées mal à propos avec les Romaines. A la verité